

Prime riunion pal gnûf Cda de ARLeF, Cisilino: «O larìn indenant a fâ sieltis coragjosis par tutelâ la lenghe»

Confermât ae vuide Eros Cisilino. Cun lui, intal Consei di aministrazion, Manlio Boccolini, Michele De Sabata, Paolo Paron, Gabriele Zanello e Giovanni D'Alì

Fresc di nomene, al è stât clamât adun, ai 15 di Novembar dal 2023, il gnûf Consei di aministrazion de ARLeF – Agenzie regjonâl pe lenghe furlane, cun a cjâf Eros Cisilino, riconfermât ae presidence dopo il mandât precedent, scomençât intal 2018. Vie pes ultimis setemanis, di fat, la Zonte regjonâl e à proviodût a designâ il gnûf Cda cun chestis nomenis: Manlio Boccolini, Michele De Sabata, Paolo Paron, Gabriele Zanello e tant che revisôr unic dai conts, Giovanni D'Alì.

Vie par cheste prime riunion dal Cda, Cisilino al à marcât cemût che: «*Tai ultins agns o vin puartât indenant ativitâts impuartantis pe tutele de lenghe furlane. O vin fat sieltis coragjosis metudis adun intal "Plan Gjenerâl di Politiche Linguistiche 2021-2025"; un document che al à ricevût supuart di plui bandis, e che al è stât cjapât tant che esempi in plui ocasions. O partirin propit di chi, ven a stâi di chel che al è stât fat. O vin fondis saldis che nus permetaran di olsâ ancjemò di plui tai agns denant di nô cuntun gnûf PGjPL. Un dai obietîfs al sarâ sigûr chel di insaldâ ativitâts che vuê a son fundamentâls, chês indreçadis ai plui zovins, che a son chei che a coltivaran la lenghe intal avignî. Tal passât plui resint lu vin fat intes scuellis, cun ativitâts indreçadis aes fameis, cu la presince sui social, tant doprâts dai fantats. Dome dant ducj i struments fundamentâi aes gnovis gjenerazions, un doman chestis a podaran cjaminâ di bessolis tignint alte la bandiere de lôr lenghe. Al covente lâ indenant a lavorâ in cheste direzion, cui voi che a cjalin simpri bande il doman».*

Udin, ai 16 di Novembar dal 2023

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<